

مُنِيَّةُ الْمُصَلِّي

MUNYATUL MUSOLLI

(Cita-Cita Orang Yang Bersembahyang)

07 KHUSYU' DAN ADAB DI DALAM SEMBAHYANG

Dan dinyatakan khusyu' dan tawadhu' (تواضع) bagi Allah tatkala ruku'nya dan sujudnya dan memenuhi hati bagiya dengan **ta'zhim** (تعظيم - membesarkan) bagi Allah dan menyucikan Allah tatkala takbirnya dan tasbihnya. Dan menjauhkan berfikir akan yang lain daripada yang ada ia padanya; daripada memikirkan dunia dan akan keinginan hawa nafsunya dan berkhabar-khabar hati. Tetapi adalah citanya itu di dalam sembahyangnya disimpan atas mendirikan haqnya dan menunaikan dia (sembahyang) seperti barang yang disuruh Allah kerana bahawasanya sembahyang itu serta tambatan hatinya.

Orang yang tiada khusyu' hatinya dan khudu' (خضوع) hatinya serta Allah, tiada memberi manfaat dan tiada faedah, tetapi mudharatnya dan seksanya terlebih hampir kepadanya.

Dan kata Hasan Al-Basri رحمته الله: "Tiap-tiap sembahyang yang tiada hadir hati padanya, maka iaitu kepada seksa itu terlebih hampir."

Dan lagi, disebut pada hadits:

"Tiada bagi hamba daripada sembahyangnya, melainkan barang yang dikira-kirakan."

Yakni, barang yang dihadapir hati serta Tuhannya daripada sembahyangnya.

Dan bahawasanya orang yang sembahyang, sanya sembahyang ia maka tiada disurat baginya daripada sembahyang **sudusnya** (سدس - satu perenam) dan tiada **'usyur** (عشر - satu persepuluh). Yakni, bahawasanya yang disurat baginya daripadanya kadar yang ada padanya hadir hati serta Allah. Dan yang demikian itu, terkadang sedikit hadirnya dan terkadang banyak dengan kadar lalainya dan jaganya. Maka orang yang hadir lagi **khasyi'** (خاشع - orang yang khusyu') sekalian sembahyangnya, disurat baginya sekalian pahala. Dan yang lalai pada sekalian sembahyang, tiada disurat baginya sesuatu.

Maka **ijtihaad** (اجتهاد - bersungguh-sungguh) olehmu, hai orang yang berkehendak akan lazat munajatkan akan Tuhannya. Mudah-mudahan dikasihani Allah akan kamu.

Maka hendaklah kita ijtihaad sebolehnya pada khusyu' dan hadir hati dan ikhlaskan dia bagi Allah. Dan hendaklah **tadabbur** (تدبر - perhatikan) akan barang yang kita baca daripada Kalam Tuhan kita di dalam sembahyang. Dan jangan bersegera apabila membaca segala bacaannya. Maka bahawasanya tiada dapat **tadabbur** serta bersegera.

Dan apabila ruku' dan sujud, maka hendaklah tetapkan serta toma'ninah. Dan jangan engkau **pagutkan** (فاكوت - patuk) seperti pagut ayam. Maka tiada sah sembahyang, kerana toma'ninah itu rukun sembahyang. Tiada sah sembahyang sama ada fardhunya atau sunatnya dengan ketiadaannya, kerana orang yang tiada sempurnakan ruku'nya dan sujudnya dan khusyu' di dalam sembahyangnya itu ialah dinamakan orang yang mencuri. Seperti barang yang disebut pada hadits, bahawasanya orang yang memelihara atasnya sembahyang dan menyempurna ia akan rukunnya, keluarlah sembahyangnya putih bercahaya-cahaya, dan berkata ia, "Telah memelihara akan dikau Allah seperti barang yang kamu peliharakan kami."

Dan orang yang tiada menyempurnakan sembahyang, keluar oleh sembahyang itu hitam lagi kelam dan berkata ia, "Telah mensia-sia akan dikau Allah seperti barang yang mensia-sia akan kami."

Kemudian digulungkan dia seperti menggulung seseorang akan kainnya yang buruk. Maka dipukul dengan dia akan mukanya.

Dan lagi disebut pada hadits:
"Sungguhnya sembahyang itu menetapkan segala anggota dan kelakuan dan mengkhusyu'kan dia dan mengkhudu'kan dia."

Dan tatkala melihat Nabi ﷺ akan seorang laki-laki bermain-main dengan janggutnya di dalam sembahyang, maka sabdanya, "Jikalau khusyu' hati laki-laki itu, nescaya khusyu' segala anggotanya." Maka menyatakan Nabi ﷺ, "Bahawasanya khusyu' anggota itu daripada khusyu' hati. Dan tiada sempurna sembahyang dengan ketiadaannya."

Dan adalah salaf solih-solih sehingga-hingga khusyu' pada sembahyangnya. Dan menghingga-hinggakan dia sehingga-hingga adalah setengah mereka itu pada tengah sembahyang, datang burung hinggap ia di atas menyangka akan pagar sesuatu **jamad** (جماد - benda yang tidak bernyawa) kerana tetapnya dan panjang qiyamnya dan sujudnya.

Dan adalah setengah daripada mereka itu, berkata ia bagi ahlinya dan anaknya, "Apabila masuk aku kepada sembahyang, maka perbuat olehmu barang yang betapa kehendak kamu, yakni daripada mengangkat akan suara dan hingar-bingar. Maka aku bahawasanya tiada tahu aku dengan ia."

Dan adalah setengah daripada sahabat ﷺ sembahyang ia di dalam kebun pohon tamar baginya. Maka terbang burung daripada satu pohon kayu kepada satu. Dan jadilah ia menilik kepadanya. Maka melalaikan dia daripada sembahyangnya. Maka tatkala diketahui akan dirinya lalai, sukarlah ia atasnya. Maka dijadikan kebunnya sekalian sabilillah kerana ia melalaikan dia daripada sembahyangnya.

Demikian lagi kelakuan salaf yang solih, sebab mengetahui mereka itu akan kebesaran pada sembahyang dan amat ketinggian tempatnya pada Allah dan RasulNya.

Kata setengah ulama' telah sampai kepada kami khabar, bahawasanya Allah ﷻ membahagi akan segala amal sembahyang atas 40 sof daripada malaikat pada tiap-tiap sof 70 ribu; 10 daripadanya berdiri tiada ruku', dan 10 ruku' tiada sujud, dan 10 sujud tiada angkat kepalanya, dan 10 duduk tiada berdiri, dan dihimpun akan sekalian amal mereka itu bagi hambaNya yang Mukmin di dalam dua raka'at yang disembahyangkan keduanya. Maka tilik olehmu akan besar pemberian Allah dan kurniaanNya atas sekalian hambaNya yang Mukminin.